

# 24 juin 1985 - Maria Ida Viglino

Amédée Bertolin

Sois sage, ô ma douleur,  
et tiens-toi plus tranquille.  
C. BAUDELAIRE

Perqué n'at un dzen solei et dz'i tant fret ?  
Dze si comme un aousè qu'un tsachaou l'at blèchè.  
Dz'attendo pamè ren... et dze si trop lagnà...  
Lèichade-mè solet...

Dz'i ma a l'ametsè et a l'afféichon.  
Dz'i ma i respet. Dz'i ma a l'admirachon.  
Dz'i ma a min passà et a min presen.  
Dz'i ma a mina enfance de Pallin.  
Dz'i ma a cen que n'at de pi dzen.  
Dz'i ma i s-esperance et i souveni.  
Dz'i ma i parole que dz'i jamè deut.  
Dz'i ma a la tristesse et ma i tsagrin.  
Dz'i ma a tseut le sentemen pi bon  
que mamma l'ayet apprei-me, mèinaillon.  
Dz'i ma a min français et a min patoé.  
Dze sento un vouido : euna désolachon  
que poye sensa remechon itor de mè.

Lèichade-mè solet  
atot ci pèis que l'est tset desu mè.  
Atot cetta douleur drèchae comme euna creu.  
Atot ci 24 jeun planto comme euna etzarda  
dedin lo cœur : et dze sèino dedin mè.

Lèichade-mè solet...

Dze voudri demandé i Bondzeu : perqué ?  
perqué cetta tristesse apré tan de tristesse ?

Perqué n'at un dzen solei et dz'i tan fret ?

Amédée Bertolin